

全上古三代秦漢三國六朝文

全漢文卷七

烏程嚴可均校輯

元帝

帝諱爽宣帝長子地節三年立爲皇太子黃龍元年十二月卽位改元四初元永光建昭竟寧在位十六年諡曰孝元皇帝廟號高宗

封王禁制書

初元元年三月癸卯

其封婕妤父丞相少史王禁爲陽平侯位特進

漢書五行志中之上

申明毀廟制書

建昭五年

孝宣皇帝尊孝武廟曰世宗損益之禮不敢有與焉他皆如舊制

漢書韋玄成傳初上定迭毀禮獨尊孝文廟爲太宗而孝武廟親未盡故未毀上于是酒復申明之曰云云傳又載哀帝卽位孔光何武奏言建昭五年制書與此同唯少末句

議律令詔

夫法令者所已抑暴扶弱欲其難犯而易避也今律令煩多而不約自典文者不能分明而欲羅元元之不逮斯豈刑中之意哉其議律令可蠲除輕減者條奏唯在便安萬姓而已

漢書刑法志元帝初立通下詔

遣使循行天下詔

初元元年四月

朕承先帝之聖緒獲奉宗廟戰戰兢兢聞者地數動而未靜懼干天地之戒不知所繇方田作時朕憂蒸庶之失業臨遣光祿大夫褒等十二人循行天下存問耆老鰥寡孤獨困乏失職之民延登賢俊招顯側陋因覽風俗之化相守二千石誠能正躬勞力宣明教化已親萬姓則六合之內和親庶幾康無憂矣書不云乎股肱良哉庶事康哉布告天下使明知朕意

漢書元紀

免災民租賦詔

初元元年四月

關東今年穀不登民多困乏其令郡國被災害甚者毋出租賦江海陂湖園池屬少府者已假貧民勿租賦賜宗室有屬籍者馬一

匹至二駟三老孝者帛五匹老者力田三匹鰥寡孤獨二匹吏民

五十戶牛酒

漢書元紀

節省詔

初元元年九月

閒者陰陽不調黎民饑寒無已保治惟德淺薄不足已充入舊貫之居其令諸宮館希御幸者勿繕治大僕減穀食馬水衡省肉食

獸

漢書元紀

令孔霸奉孔子祀詔

初元元年

其令師襄成君關内侯霸呂所食邑八百戶祀孔子焉

漢書孔光傳

災異求言詔

初元二年三月

蓋聞賢聖在位陰陽和風雨時日月光星辰靜黎庶康寧考終厥命今朕恭承天地託于公侯之上明不能燭德不能綏災異竝臻連年不息乃二月戊午地震于隴西郡毀落太上皇廟殿壁木節壞敗獬道縣城郭官寺及民室屋壓殺人眾山崩地裂水泉湧出

一年地再動天惟降災震驚朕師

翼奉傳作射

治有大廟咎至于斯夙

夜兢兢不通大變深惟鬱悼未知其序開者歲數不登元元困乏

不勝饑寒已陷刑辟朕甚閔之已詔吏虛倉廩開府臧振救貧民

郡國被地動災甚者無出租賦赦天下羣司其茂思天地之戒有

可蠲除減省已便萬姓者各條奏悉意陳朕過失毋有所諱丞相

御史中二千石舉茂材異等直言極諫之士朕將親覽焉

漢書元紀又見

翼奉傳各有刪節今合錄之

又詔初元二年七月

歲比災害民有菜色慘怛于心已詔吏虛倉廩開府庫振救賜寒

者衣今秋禾麥頗傷一年中地再動北海水溢流殺人民陰陽不

和其咎安在公卿將何已憂之其悉意陳朕過靡有所諱

漢書元紀

原蕭望之詔

初元三年秋

制詔丞相御史前將軍望之傳朕八年亡它罪過今事久遠識忘

難明其赦望之罪收前將軍光祿勳印綬

漢書曰賜望之傳

賜蕭望之爵邑詔

初元三年冬

制詔御史國之將興尊師而重傳故前將軍望之傅朕八年道已

經書厥功茂焉其賜爵關內侯食邑八百戶給事中朝朔望坐次

將軍

漢書元紀又蕭望之傳

詔免諸葛豐

制詔御史城門校尉豐前與光祿勳堪光祿大夫猛在朝之時數

稱言堪猛之美豐前爲司隸校尉不順四時修法度專作苛暴已

獲虛威朕不忍下吏已爲城門校尉不內省諸己而反怨堪猛已

求報舉告案難證之辭暴揚難驗之罪毀譽恣意不顧前言不信

之大者也朕憐豐之耆老不忍加刑其免爲庶人

漢書諸葛豐傳

左遷周堪張猛詔

豐言堪猛貞信不立朕閔而不治又惜其材能未有所效其左遷

堪爲河東太守猛槐里令

漢書劉向傳

罷珠厓郡詔

初元三年春

珠厓虜殺吏民背叛爲逆今廷議者或言可擊或言可守或欲棄之其指各殊朕日夜惟思議者之言毒威不行則欲誅之狐疑辟難則守屯田通于時變則憂萬民夫萬民之饑餓與遠蠻之不計危孰大焉且宗廟之祭凶年不備況乎辟不嫌之辱哉今關東大困倉庫空虛無已相贍又已動兵非特勞民凶年隨之其罷珠厓郡民有慕義欲內屬便處之不欲勿彊

漢書賈捐之傳又見後漢鮮卑傳

赦詔

初元三年四月

迺者火災降于孝武園館朕戰栗恐懼不燭變異咎在朕躬羣司又未肯極言朕過已至于斯將何已寤焉百姓仍遭凶阨無已相振加已煩擾虐苛吏拘牽虐徵文不得永終性命朕甚閔焉其赦

天下

漢書元紀

求言詔

初元三年六月

蓋聞安民之道本繇陰陽閒者陰陽錯謬風雨不時朕之不德庶幾羣公有敢言朕之過者今則不然媮合苟從未肯極言朕甚閔焉永惟烝庶之飢寒遠離父母妻子勞于非業之作備于不居之宮恐非所已佐陰陽之道也其罷甘泉建章宮衛令就農百官各省費條奏母有所諱有司勉之母犯四時之禁丞相御史舉天下明陰陽災異者各三人

漢書元紀

因災異改行新政詔

初元五年四月

朕之不逮序位不明眾僚久廢未得其人元元失望上感皇天陰陽爲變咎流萬民朕甚懼之迺者關東連遭災害飢寒疾疫夭不終命詩不云乎凡民有喪匍匐救之其令大官毋日殺所具各減半乘輿秣馬無乏正事而已罷角抵上林宮館希御幸者齊三服官北假田官鹽鐵官常平倉博士弟子毋置員已廣學者賜宗室

子有屬籍者馬一匹至二騾三老孝者帛人五匹弟者力田三匹
鰥寡孤獨二匹吏民五十戶牛酒漢書元紀

詔條責丞相御史

惡吏負賊妄意良民至亡辜死或盜賊發吏不亟追而反繫亡家
後不敢復告曰故寢廣民多冤結州郡不理連上書者交于闕廷
二千石選舉不實是已在位多不任職民田有災害吏不肯除收
趣其租曰故重困關東流民飢寒疾疫已詔吏轉漕虛倉廩開府
藏相振救賜寒者衣至春猶恐不贍今丞相御史將欲何施曰塞
此咎悉意條狀陳朕過失漢書于定國傳

復詔條責丞相御史

永光元年

郎有從東方來者言民父子相棄丞相御史案事之吏匿不言邪
將從東方來者加增之也何曰錯繆至是欲知其實方今年歲未
可預知也郎有水旱其憂不細公卿有可曰防其未然救其已然

者不各曰誠對母有所諱

漢書
定國傳

赦詔

永光元年三月

五帝三王任賢使能已登至平而今不治者豈斯民異哉咎在朕之不明亡已知賢也是故壬人在位而吉士雍蔽重臣周秦之弊民漸薄俗去禮義觸刑法豈不哀哉繇此觀之元元何辜其赦天下令厲精自新各務農畝無田者皆假之貸種食如貧民賜吏六百石曰上爵五大夫勤事吏二級爲父後者民一級女子百戶牛酒鰥寡孤獨高年帛

漢書
元紀

大赦詔

永光二年二月

蓋聞唐虞象刑而民不犯殷周法行而姦軌服今朕獲承高祖之洪業託位公侯之上夙夜戰栗永惟百姓之急未嘗有忘焉然而陰陽未調三光晦昧元元大困流散道路盜賊竝興有司又長殘賊失牧民之術是皆朕之不明政有所虧咎至于此朕甚自恥爲

民父母若是之薄謂百姓何其大赦天下賜民爵一級女子百戶
牛酒鰥寡孤獨高年三老孝弟力田帛又賜諸侯王公主列侯黃
金中二千石弓下至中都官長吏各有差吏六百石弓上爵五大
夫勤事吏各二級

漢書
元紀

日食詔

永光二年三月

朕戰戰栗栗夙夜思過失不敢荒寧惟陰陽不調未燭其咎婁敕
公卿日望有效至今有司執政未得其中施與禁切未合民心暴
猛之俗彌長和睦之道日衰百姓愁苦靡所錯躬是已氛邪歲增
侵犯太陽正氣湛掩日久奪光迺壬戌日有蝕之天見大異已戒
朕躬朕甚悼焉其令內郡國舉茂材異等賢良直言之士各一人

漢書
元紀

赦詔

永光二年六月

聞者連年不收四方咸困元元之民勞于耕耘又亡成功困于饑

饑亡已相救朕爲民父母德不能覆而有其刑甚自傷焉其赦天

下

漢書
元紀

封馮奉世關內侯詔 永光二年

羌虜桀黠賊害吏民攻隴西府寺燔燒置亭絕道橋甚逆天道左將軍光祿勳奉世前將兵征討斬捕首虜八千餘級鹵馬牛羊已萬數賜奉世爵關內侯食邑五百戶黃金六十斤

漢書馮
奉世傳

畱屯田

永光二年冬

羌虜破散創艾亡逃出塞其罷吏士頗畱屯田要害處

漢書馮奉
世傳上曰

責吏詔

永光三年十一月

迺者己丑地動中冬雨水大霖盜賊竝起吏何不已時禁各悉意

對

漢書
元紀

赦詔 永光四年二月

朕存至尊之重不能燭理百姓屢遭凶咎加已邊竟不安師旅在

外賦斂轉輸元元騷動窮困亡聊犯法抵罪夫上失其道而繩下
已深刑朕甚痛之其赦天下所貸貧民勿收責

漢書
元紀

日蝕求言詔

永光四年六月

蓋聞明王在上忠賢布職則羣生和樂方外蒙澤今朕暗于王道
夙夜憂勞不通其理靡瞻不眩靡聽不惑是已政令多還民心未
得邪說空進事亡成功此天下所著聞也公卿大夫好惡不同或
緣姦作邪侵削細民元元安所歸命哉迺六月晦日有蝕之詩不
云乎今此下民亦孔之哀自今已來公卿大夫其勉思天戒慎身
修永已輔朕之不逮直言盡意無有所諱

漢書
元紀

徵周堪詔

永光四年六月

河東太守堪先帝賢之命而傳朕資質淑茂道術通明論議正直
秉心有常發憤惻愍信有憂國之心已不能阿尊事貴孤特寡助
抑厭遂退卒不克明往者眾臣見異不務自修深惟其故而反瞻

昧說天託咎此人朕不得已出而試之已彰其材堪出之後大變
仍臻眾亦嘿然堪治末期年而三老官屬有識之士詠頌其美使
者過郡靡人不稱此固足已彰先帝之知人而朕有已自明也俗
人乃造端作基非議詆欺或引幽隱非所宜明意疑已類欲已陷
之朕亦不取也朕迫于俗不得專心乃者天著大異朕甚懼焉今
堪年衰歲暮恐不得自信排于異人將安究之哉其徵堪詣行在
所

漢書劉向傳

議罷郡國廟詔

永光四年十月

朕聞明王之御世也遭時爲法因事制宜往者天下初定遠方未
賓因嘗所親已立宗廟蓋建威銷萌一民之至權也今賴天地之
靈宗廟之福四方同軌蠻貊貢職久遵而安定令疏遠卑賤共承
尊祀殆非皇天祖宗之意朕甚懼焉傳不云乎吾不與祭如不祭
其與將軍列侯中二千石二千石諸大夫博士議郎議

漢書韋玄成傳

初陵勿置縣邑詔

永光四年十月

安土重遷黎民之性骨肉相附人情所願也頃者有司緣臣子之義奏徙郡國民已奉園陵令百姓遠棄先祖墳墓破業失產親戚別離人懷思慕之心家有不安之意是已東垂被虛耗之害關中有無聊之民非久長之策也詩不云乎民亦勞止迄可小康惠此中國已綏四方今所爲初陵者勿置縣邑使天下咸安土樂業亡有動搖之心布告天下令明知之

漢書元紀

議毀廟詔

永光四年十一月

蓋聞明王制禮立親廟四祖宗之廟萬世不毀所已明尊祖敬宗著親親也朕獲承祖宗之重惟大禮未備戰栗恐懼不敢自顯其與將軍列侯中二千石二千石諸大夫博士議

漢書章立成傳

正毀廟遷主禮儀詔

永光五年

蓋聞王者祖有功而宗有德尊尊之大義也存親廟四親親之至

恩也。高皇帝爲天下誅暴除亂，受命而帝，功莫大焉。孝文皇帝國
爲代王，諸呂作亂，海內搖動，然羣臣黎庶靡不壹意北面而歸心，
猶謙辭固讓而後卽位，削亂秦之迹，興三代之風，是已百姓晏然，
咸獲嘉福，德莫盛焉。高皇帝爲漢太祖，孝文皇帝爲太宗，世世承
祀，傳之無窮，朕甚樂之。孝宣皇帝爲孝昭皇帝後，于義一體。孝景
皇帝廟及皇考廟，皆親盡，其正禮儀。漢書章帝成傳
赦甘延壽、陳湯矯制罪，詔建昭四年正月。

匈奴郅支單于背畔禮義，畱殺漢使者，吏士甚逆道理，朕豈忘之
哉？所已優游而不征者，重動師眾，勞將率，故隱忍而未有云也。今
延壽、湯睹便宜，乘時利，結城郭諸國，擅興師，矯制而征之，賴天地
宗廟之靈，誅討郅支單于，斬獲其首，及闕氏貴人名王已下千數，
雖踰義干法，內不煩一夫之役，不開府庫之藏，因敵之糧，已贍軍
用，立功萬里之外，威震百蠻，名顯四海，爲國除殘，兵革之原息，邊

竟得已安然猶不免死亡之患罪當在于奉憲朕甚閔之其赦延

壽湯罪勿治

漢書陳湯傳

遣使循行天下詔

建昭四年四月

朕承先帝之休烈夙夜栗栗懼不克任閒者陰陽不調五行失序百姓饑饉惟烝庶之失業臨遣諫大夫博士賞等二十一人循行天下存問耆老鰥寡孤獨乏困失職之人舉茂材特立之士相將九卿其帥意毋怠使朕獲觀教化之流焉

漢書元紀

赦詔

建昭五年三月

蓋聞明王之治國也明好惡而定去就崇敬讓而民興行故法設而民不犯今施而民從今朕獲保宗廟兢兢業業匪敢懈怠德薄明晡教化淺微傳不云虘百姓有過在予一人其赦天下賜民爵一級女子百戶牛酒三老孝弟力田帛

漢書元紀

禁妨農詔

建昭五年三月

方春農桑興百姓戮力自盡之時也故是月勞農勸民無使後時
今不哀之吏覆案小罪徵召證案興不急之事曰妨百姓使失一
時之作亡終歲之功公卿其明察申救之

漢書元紀

改元竟寧詔

竟寧元年正月

匈奴郅支單于背叛禮義既伏其辜虜韓邪單于不忘恩德鄉慕
禮義復修朝賀之禮願保塞傳之無窮邊垂長無兵革之事其改
元爲竟寧

漢書元紀

召張譚爲御史大夫詔

竟寧元年三月

剛強堅固確然亡欲大鴻臚野王是也心辨善辭可使四方少府
五鹿充宗是也廉絜節儉太子少傅張譚是也其召少傅爲御史
大夫

漢書馮奉世附傳

敕東平王傅相詔

夫人之性皆有五常及其少長耳目牽于耆欲故五常銷而邪心

作情亂其性利勝其義而不失厥家者未之有也今王富于春秋
氣力勇武獲師傅之教淺加已少所聞見自今已來非五經之正
術敢已游獵非禮道王者輒已名聞

漢書宣元
六王傳

璽書勞馮奉世且讓之

永光二年

皇帝問將兵右將軍甚苦暴露羌虜侵邊境殺吏民甚逆天道故
遣將軍帥士大夫行天誅已將軍材質之美奮精兵誅不軌百下
百全之道也今乃有畔敵之名大爲中國羞已昔不閑習之故邪
已恩厚未洽信約不明也朕甚怪之上書言羌虜依深山多徑道
不得不多分部遮要害須得後發營士足已決事部署已定執不可
復置大將聞之前爲將軍兵少不足自守故發近所騎日夜詣非爲
擊也今發三輔河東弘農越騎迹射欽飛轂者羽林孤兒及呼速
索等種方急遣且兵凶器也必有成敗者患策不豫定料敵不審
也故復遣舊武將軍兵法曰大將軍出必有偏裨所已揚威武參

計策將軍又何疑焉夫愛吏士得眾心舉而無悔禽敵必全將軍之職也若乃轉輸之費則有司存將軍勿憂須奮武將軍兵到合

擊羌虜

漢書馮奉世傳

賜淮陽王欽璽書

建昭

皇帝問淮陽王有司奏王舅張博數遺王書非毀政治謗訕天子
廢舉諸侯稱引周湯已調惑王所言尤惡悖逆無道王不舉奏而
多與金錢報已好言舉至不赦朕惻焉不忍聞爲王傷之推原厥
本不祥自博惟王之心匪同于凶已詔有司勿治王事遣諫大夫
駿申諭朕意詩不云乎靖恭爾位正直是與王其勉之

漢書宣元六王傳

敕諭東平王宇璽書

皇帝問東平王蓋聞親親之恩莫重于孝尊尊之義莫大于忠故
諸侯在位不驕已致孝道制節謹度已翼天子然後富貴不離于
身而社稷可保今聞王自修有關本朝不和流言紛紛謗自內興

朕甚憮焉。爲王懼之。詩不云乎。毋念爾祖。述修厥德。永言配命。自求多福。朕惟王之春秋方剛。忽于道德。意有所移。忠言未納。故臨遣太中大夫子蟠諭王朕意。孔子曰。過而不改。是謂過矣。王其深維孰思之。無違朕意。漢書宣元六王傳

賜東平王太后璽書

皇帝使諸吏宦者令承問東平王太后。朕有聞王太后少加意焉。夫福善之門。莫美于和睦。患咎之首。莫大于內離。今東平王出襁褓之中。而託于南面之位。如已年齒方剛。涉學日寡。驚忽臣下。不自它于太后。已足之閒。能無失禮義者。其唯聖人乎。傳曰。父爲子隱。直在其中矣。王太后明察此意。不可不詳。閨門之內。母子之閒。同氣異息。骨肉之恩。豈可忽哉。豈可忽哉。昔周公戒伯禽曰。故舊無大故。則不可棄也。母求備于一人。夫曰故舊之恩。猶忍小惡。而況此乎。已遣使者諭王。王既悔過服罪。太后寬忍。已貴之後。宜不

啟王太后強餐止思念慎疾自愛

漢書宣元六王傳

賜諸葛豐書

夫司隸者刺舉不法善善惡惡非得顯之也免處中和順經術意

漢書諸葛豐傳

報貢禹

朕已生有伯夷之廉史魚之直守經據古不阿當世孳孳于民俗之所寡故親近生幾參國政今未得久聞生之奇論也而云欲退意豈有所恨與將在位者與生殊乎往者嘗令金敞語生欲及生時祿生之子既已論矣今復云子少夫已王命辨護生家雖百子何已加傳曰亡懷土何必思故鄉生其強飯慎疾已自輔

漢書貢禹傳

報于定國

永光元年

君相朕躬不敢怠息萬方之事大錄于君能無過者其唯聖人方今承周秦之敝俗化陵夷民寡禮誼陰陽不調災咎之發不爲一

端而作、自聖人推類已記、不敢專也、況于非聖者乎、日夜惟思所

已、未能盡明、經曰、萬方有罪、罪在朕躬、君雖任職、何必顯焉、其勉

察郡國守相郡牧、非其人者、毋令久賊民、永執綱紀、務悉聰明、強

食慎疾、

漢書于定國傳、定國上書、自効歸侯、印乞骸骨、上報、

詰問賈捐之、

初元三年春

珠厓內屬、爲郡久矣、今背叛逆節、而云不當擊、長蠻夷之亂、虧先

帝功德、經義何已處之、

漢書賈捐之傳、初元元年、珠厓又反、連年不定、捐之建議、已爲不當擊、上使侍中駙

馬都尉樂昌侯、王商詰問捐之、

使許嘉口諭呼韓邪單于、

建昭

單于上書、願罷北邊、吏士屯戍、子孫世世保塞、單于鄉慕禮義、所已

爲民計者甚厚、此長久之策也、朕甚嘉之、中國四方、皆有關梁障

塞、非獨已備塞外也、亦已防中國、茲邪放縱、出爲寇害、故明法度、

已專眾心也、敬諭單于之意、朕無疑焉、爲單于怪其不罷、故使大

司馬車騎將軍嘉曉單于

漢書匈奴傳下

賜進士出身二品銜廣東等處提刑按察使司按察使兼管驛傳事務黃岡王毓藻校聚

全漢文卷七終

全漢文卷八

烏程嚴可均校輯

成帝

帝諱驁字太孫元帝太子竟寧元年六月卽位改元七建始河平陽朔鴻嘉永始元延綏和在位二十六年謚曰孝成皇帝廟號統宗

徙陳湯制永始元年

廷尉增壽當是湯前有討郅支單于功其免湯爲庶人徙邊漢書陳湯傳

徙解萬年制

故將作大匠萬年佞邪不忠妄爲巧詐多賦斂煩絲役興卒暴之作卒徒蒙辜死者連屬毒流眾庶海內怨望雖蒙赦令不宜居京師漢書陳湯傳

大赦詔

建始元年二月

邇者火災降於祖廟、有星孛於東方、始正而虧、咎孰大焉、書云、惟先假王正厥事、羣公孜孜、帥先百寮、輔朕不逮、崇寬大、長和睦、凡事恕己、毋行苛刻、其大赦天下、使得自新、漢書成紀

赦罪減賦詔

建始二年正月

邇者徙泰時后土于南郊北郊、朕親飭躬郊祀上帝、皇天報應、神光並見、三輔長無共張繇役之勞、赦奉郊縣長安長陵及中都官

耐罪徒、減天下賦錢算四十、

漢書成紀

遣使循行天下詔

建始三年九月

邇者郡國被水災、流殺人民多至千數、京師無故訛言大水至、吏民驚恐、奔走乘城、殆苛暴深刻之吏未息、元元冤失職者眾、遣諫

大夫林等循行天下、

漢書成紀

舉賢良方正詔

建始三年十二月

蓋聞天生眾民不能相治爲之立君曰統理之君道得則艸木昆蟲咸得其所人君不德謫見天地災異叟發已告不治朕涉道日寡舉錯不中乃戊申日蝕地震朕甚懼焉公卿其各思朕過失明白陳之女無面從退有後言丞相御史與將軍列侯中二千石及內郡國舉賢良方正能直言極諫之士詣公車朕將覽焉

漢書成紀

詔有司復東平削縣

蓋聞仁曰親親古之道也前東平王有闕有司請廢朕不忍又請削朕不敢專惟王之至親未嘗忘於心今聞王改行自新尊修經術親近仁人非法之求不曰奸吏朕甚嘉焉傳不云乎朝曰過夕改君子與之其復前所削縣如故

漢書宣元六王傳

加秩王尊詔

建始四年

制詔御史東郡河水盛長毀壞全隄未決二尺百姓惶恐奔走太守身當水衝履咫尺之難不避危殆已安眾心吏民復還就作水

不爲災朕甚嘉之秩尊中二千石加賜黃金二十斤

漢書王傳

改元河平詔

河平元年三月

河決東郡流漂二州校尉王延世隄塞輒平其改元爲河平賜天

下吏民爵各有差

漢書成紀

東郡河決流漂二州校尉延世隄防三旬立塞其已五年爲河平

元年卒治河者爲著外繇六月惟延世長於計策功費約省用力

日寡朕甚嘉之其已延世爲光祿大夫秩中二千石賜爵關內侯

黃金百斤

漢書溝洫志

日蝕求言大赦詔

河平元年四月

朕獲保宗廟戰戰栗栗未能奉稱傳曰男敎不修陽事不得則日

爲之蝕天著厥異辜在朕躬公卿大夫其勉悉心已輔不逮百寮

各脩其職惇任仁人退遠殘賊陳朕過失無有所諱大赦天下

漢書

紀

免丞相王商詔

河平四年

制詔御史蓋丞相曰德輔翼國家典領百寮協和萬國爲職任莫重焉今樂昌侯商爲丞相出入五年未聞忠言嘉謀而有不忠執左道之辜陷於大辟前商女弟內行不脩奴賊殺人疑商敎使爲商重臣故抑而不窮今或言商不曰自悔而反怨懟朕甚傷之惟商與先帝有外親未忍致于理其赦商罪使者收丞相印綬漢書王商傳

議減省律令詔

河平中

甫刑云五刑之屬三千大辟之罰其屬二百今大辟之刑千有餘條律令煩多百有餘萬言奇請它比曰曰益滋自明習者不知所由欲曰曉諭眾庶不亦難乎於曰羅元元之民天絕亡辜豈不哀哉其與中二千石二千石博士及明習律令者議減死刑及可蠲除約省者令較然易知條奏書不云乎惟刑之恤哉其審核之務

準古法朕將盡心覽焉

漢書刑法志

閔楚王被疾詔

河平中

蓋聞天地之性人爲貴人之行莫大于孝楚王賢素行孝順仁慈之國自來二十餘年娥介之過未嘗聞朕甚嘉之今迺遭命離于惡疾夫子所痛曰蔑之命矣夫斯人也而有斯疾也朕甚閔焉夫行純茂而不顯異則有國者將何勛哉書不云乎用德章厥善今王朝正月詔與子男一人俱其自廣戚縣戶四千三百封其子勳爲廣戚侯

漢書宣元六王傳

順時令詔

陽朔二年春

昔在帝堯立羲和之官命以四時之事令不失其序故書云黎民於蕃時雍明以陰陽爲本也今公卿大夫或不信陰陽薄而小之所奏請多違時政傳以不知周行天下而欲望陰陽和調豈不謬哉其務順四時月令

漢書成紀

舉博士詔 陽朔二年九月

古之立太學將以傳先王之業流化於天下也儒林之官四海淵原宜皆明於古今溫故知新通達國體故謂之博士否則學者無述焉爲下所輕非所以尊道德也工欲善其事必先利其器丞相御史其與中二千石二千石雜舉可充博士位者使卓然可觀漢書

勸農詔 陽朔四年正月

夫洪範八政曰食爲首斯誠家給刑錯之本也先帝勸農薄其租稅寵其強力令與孝弟同科聞者民彌惰怠鄉本者少趨末者眾將何以矯之方東作時其令二千石勉勸農桑出入阡陌致勞來之書不云乎服田力穡乃亦有秋其勛之哉漢書成紀

封王音爲安陽侯詔 陽朔四年

車騎將軍音宿衛忠正勤勞國家前爲御史大夫以外親宜典兵

馬入爲將軍、不獲宰相之封、朕甚慊焉、其封音爲安陽侯、食邑與

五侯等俱三千戶、

漢書元后傳

治冤獄詔

鴻嘉元年二月

朕承天地、獲保宗廟、明有所蔽、德不能綏、刑罰不中、眾冤失職、趨關告訴者不絕、是已陰陽錯謬、寒暑失序、日月不光、百姓蒙辜、朕甚閔焉、書不云乎、卽我御事、罔克耆壽、咎在厥躬、方春生長時、臨遣諫大夫理等、舉三輔三河弘農冤獄、公卿大夫刺史、明申赦守相、稱朕意焉、其賜天下民爵一級、女子百戶牛酒、加賜鰥寡孤獨高年帛、逋貸未入者、勿收、

漢書成紀

封丙吉孫詔

鴻嘉元年六月

制詔丞相御史、蓋聞褒功德、繼絕統、所已重宗廟、廣賢聖之路也、故博陽侯吉、已舊恩有功而封、今其祀絕、朕甚憐之、夫善善及子孫、古今之通誼也、其封吉孫中郎將關內侯昌爲博陽侯、奉吉後

漢書兩
古傳

封史丹爲武陽侯詔

鴻嘉元年

夫褒有德賞元功古今通義也左將軍丹往時導朕曰忠正秉義
醇壹舊德茂焉其封丹爲武陽侯國東海郟之武彊聚戶千一百

漢書史

丹傳

選賢詔

鴻嘉二年三月

古之選賢傳納曰言明試曰功故官無廢事下無逸民教化流行
風雨和時百穀用成眾庶樂業咸曰康寧朕承鴻業十有餘年數
遭水旱疾疫之災黎民婁困於饑寒而望禮義之興豈不難哉朕
既無已率道帝王之道日曰陵夷意迺招賢選士之路鬱滯而不
通與將舉者未得其人也其舉敦厚有行義能直言者冀聞切言
嘉謀匡朕之不逮

漢書成紀

恤民詔

鴻嘉四年正月

數敕有司務行寬大而禁苛暴訖今不改一人有辜舉宗拘繫農民失業怨恨者眾傷害和氣水旱爲災關東流冗者眾青幽冀部尤劇朕甚痛焉未聞在位有憫然者孰當助朕憂之已遣使者循行郡國被災害什四以上民貲不滿三萬勿出租賦逋貨未入皆勿收流民欲入關輒籍內所之郡國謹遇已理務有已全活之思

稱朕意

漢書成紀

罷昌陵詔永始元年七月

朕執德不固謀不盡下過聽將作大匠萬年言昌陵三年可成作治五年中陵司馬殿門內尚未加功天下虛耗百姓罷勞客土疏惡終不可成朕惟其難怛然傷心夫過而不改是謂過矣其罷昌陵及故陵勿徙吏民令天下母有動搖之心

漢書成紀

龍見日蝕詔

永始二年二月

迺者龍見于東萊日有蝕之天著變異已顯朕郵朕甚懼焉公卿

申敕百寮深思天誠有可省減便安百姓者條奏所振貸貧民勿收

漢書成紀

吏民助振贍者賜爵詔

永始二年正月

關東比歲不登吏民曰義收食貧民入穀物助縣守振贍者已賜直其百萬以上加賜爵右更欲爲吏補三百石其吏也遷二等其三十萬以上賜爵五大夫吏亦遷二等民補郎十萬以上家無出租賦三歲萬錢以上一年

漢書成紀

封淳于長等詔

永始二年十二月

前將作大匠萬年佞邪不忠知昌陵卑下不可爲萬歲居奏請營作建置郭邑妄爲巧詐積土增高多賦斂煩繇役興卒暴之作卒徒蒙辜死者連屬百姓罷極天下匱竭常侍閤前爲大司農中丞數奏昌陵不可成侍中衛尉長數白宜早止徙家反故處朕曰長言下閤章公卿議者皆合長計首建至策閱典主省大費民曰康

監閔前賜爵關內侯黃金百斤其賜長爵關內侯食邑千戶閔五百戶萬年佞邪不忠毒流眾庶海內怨望至今不息雖蒙赦令不宜居京師其徙萬年敦煌郡

漢書成紀又見陳湯傳又見佞幸傳于長傳

遣使循行詔

永始三年正月

天災仍重朕甚懼焉惟民之失職臨遣太中大夫嘉等循行天下存問耆老民所疾苦其與部刺史舉惇樸遜讓有行義者各一人

漢書成紀

詔有司

永始四年六月

邇者地震京師火災屢降朕甚懼之有司其悉心明對厥咎朕將

親覽焉

漢書成紀

禁奢侈詔

永始四年六月

聖王明禮制曰序尊卑異車服曰章有德雖有其財而無其尊不得踰制故民興行上義而下利方今世俗奢侈僭罔極靡有厭足公

卿列侯親屬近臣四方所則未聞脩身遵禮同心憂國者也或遇奢侈逸豫務廣第宅治園池多畜奴婢被服綺縠設鐘鼓備女樂車服嫁娶葬埋過制吏民慕效寢已成俗而欲望百姓儉節家給人足豈不難哉詩不云乎赫赫師尹民具爾瞻其申敕有司目漸禁之青綠民所常服且勿止列侯近臣各自省改司隸校尉察不變者

漢書成紀

李星見求直言詔

元延元年七月

迺者日蝕星隕謫見于天大異重仍、在位默然罕有忠言、今李星見于東井、朕甚懼焉、公卿大夫博士議郎、其各悉心惟思變意、明已經對、無有所諱、與內郡國舉方正能直言極諫者各一人、北邊二十二郡舉勇猛知兵法者各一人、

漢書成紀

還許旦及親屬詔

元延四年

蓋聞仁不遺遠、誼不忘親、前平安剛侯夫人講坐大逆罪、家屬幸

蒙赦令歸故郡朕惟平恩戴侯先帝外祖魂神廢棄莫奉祭祀念之未嘗忘於心其還平恩侯旦及親屬在山陽郡者漢書外戚傳還馮參詔元延四年

中山孝王短命早薨願曰舅宜鄉侯參爲關內侯歸家朕甚愍之其還參京師曰列侯奉朝請漢書馮奉世附傳

立定陶王欣爲皇太子詔又見宣元六王傳

綏和元年二月

朕承太祖鴻業奉宗廟二十五年德不能綏理宇內百姓怨望者眾不蒙天祐至今未有繼嗣天下無所係心觀于往古近事之戒禍亂之萌皆繇斯焉定陶王欣於朕爲子慈仁孝順可曰承天序繼祭祀其立欣爲皇太子封中山王舅諫大夫馮參爲宜鄉侯益中山國三萬戶曰慰其意賜諸侯王列侯金天下當爲父後者爵三老孝弟力田帛各有差漢書

封孔吉詔

綏和元年二月

成紀

蓋聞王者必存二王之後，所曰通三統也。昔成湯受命，列爲三代。

而祭祀廢絕，考求其後，莫正孔吉。其封吉爲殷紹嘉侯。

漢書成紀

報烏珠留若鞮單于詔。

綏和元年

藩擅稱詔，從單于求地，法當死。更大赦，今徙藩爲濟南太守，不

令當匈奴。

漢書匈奴傳：夏侯藩使匈奴求地，單于遣使上書曰：「藩求地，狀聞詔報單于。」

策許嘉

將軍家重身尊，不宜曰吏職自繇，賜黃金二百斤，曰：「特進侯就朝。」

位。

漢書外戚傳下

白虎殿策方正直言。

建始四年夏

天地之道何貴？王者之法何如？六經之義何上？人之行何先？取人

之術何目？當世之治何務？各曰經對。

漢書杜欽傳

賜王音策書。

鴻嘉中

外家何甘樂禍敗，而欲自黥劓，相戮辱於太后前，傷慈母之心，曰：

危亂國外家宗族疆上一身疲弱日久今將一施之君其召諸侯

令待府舍

漢書元后傳

冊免薛宣

永始二年六月

君爲丞相出入六年忠孝之行率先百僚朕無間焉朕旣不明變異數見歲比不登倉稟空虛百姓饑饉流離道路疾疫死者已萬數人至相食盜賊並興羣職曠廢是朕之不德而股肱不良也迺者廣漢羣盜橫恣殘賊吏民朕惻然傷之數日問君君對輒不如其實西州帛絕幾不爲郡三輔賦斂無度酷吏並緣爲姦侵擾百姓詔君案驗復無欲得事實之意九卿曰下咸承風指同時陷于謾欺之辜咎繇君焉有司法君領職解媢開謾欺之路傷薄風化無已帥示四方不忍致君于理其上丞相高陽侯印綬罷歸

漢書薛宣傳

賜史丹策

永始中

左將軍寢病不瘳，願歸治疾。朕愍官職之事，久留將軍，使躬不瘳，使光祿勳賜將軍黃金五十斤，安車駟馬，其上將軍印綬，宜專精神，務近醫藥，已輔不瘳。

漢書史丹傳

賜翟方進冊

熹和二年二月

皇帝問丞相君有孔子之慮，孟賁之勇，朕嘉與君同心一意，庶幾有成。惟君登位於今十年，災害並臻，民被饑饉，加已疾疫溺死，關門牡閉，失國守備，盜賊黨輩，吏民殘賊，毆殺良民，斷獄歲歲多前，上書言事，交錯道路，懷姦朋黨，相爲隱蔽，皆亡忠慮。羣下兇兇，更相嫉妬，其咎安在？觀君之治，無欲輔朕富民便安，元元之念，聞者郡國穀雖頗孰，百姓不足者尚眾，前去城郭，未能盡還，夙夜未嘗忘焉。朕惟往時之用，與今一也。百寮用度各有數，君不量多少，一聽羣下言，用度不足，奏請一切增賦，稅城郭墾及園田過更，算馬牛羊，增益鹽鐵，變更無常，朕旣不明，隨奏許可，後議者已爲不便。

制詔下君、君云賣酒醪、後請止、未盡月、復奏議令賣酒醪、朕誠怪君何持容容之計、無忠固意、將何言輔朕帥導羣下、而欲久蒙顯尊之位、豈不難哉、傳曰、高而不危、所已長守貴也、欲退君位、尚未忍君、其孰念詳計、塞絕姦原、憂國如家、務便百姓、言輔朕、朕既已改、君其自思、強食慎職、使尚書令賜君上尊酒十石、養牛一、君審處焉、漢書翟方進傳、方進、賊守心、大臣宜當之、上遂賜冊、方進即日自殺、

賜趙婕妤書

問飛燕趙婕妤、夫人有誠、必應言實、憤懣充中、必形於色、詩云、鼓鐘于宮、聲聞于天、猶此言之、真偽之效、難言欺矣、夫君子貴素、文足通殷勤而已、亦何必華辭哉、自己親婕妤、異于他人、故不能無言、亦不言深相過望、前數言、顏色不平、應對舒遲、爲譴卒不能自改、婕妤方見親幸之時、老母在堂、兩弟皆簪金貂、並侍於側、同列比舍、豈不謂婕妤兄弟尊幸哉、今遇蒙譴、獨謂老親兩弟何、御覽一百

同十四引
婦人集

答趙皇后

因閱來奏喜慶交集夫妻之私義均一體社稷之重嗣續其先妊
體方初保綏宜厚藥有性者勿舉食無毒者可親有懇求上無煩
賤奏口授宮使可矣秦醉趙飛燕別傳

報匡衡初即位

君曰道德脩明位在三公先帝委政遂及朕躬君遵修法度勤勞
公家朕嘉與君同心合意庶幾有成今司隸校尉尊妄詆欺加非
於君朕甚憫焉方下有司問狀君何疑而上書歸戾乞骸骨是章
朕之未燭也傳不云乎禮義不愆何恤人之言君其察焉專精神
近醫藥強食自愛漢書成帝紀又見匡衡傳

報王鳳初即位

朕承先帝聖緒涉道未深不明事情是日陰陽錯繆日月無光赤

黃之氣充塞天下、咎在朕躬、今大將軍、迺引過自予、欲上尚書事、歸大將軍印綬、罷大司馬官、是明朕之不德也、朕委將軍曰事、誠欲庶幾有成、顯先祖之功德、將軍其專心固意、輔朕之不逮、毋有所疑、

漢書元后傳

報張禹

朕曰幼年、執政萬機、懼失其中、君曰道德爲師、故委國政、君何疑而數乞骸骨、忽忘雅素、欲避流言、朕無聞焉、君其固心致思、總秉諸事、推曰孳孳、無違朕意、加賜黃金百斤、養牛上尊酒、大官致餐、侍醫視疾、使者臨問、

漢書張禹傳

報許皇后

皇帝問皇后所言事、聞之、夫曰者、眾陽之宗、天光之貴、王者之象、人君之位也、夫曰陰而侵陽、虧其正體、是非下陵上、妻乘夫、賤踰貴之變、與春秋二百四十二年變異爲眾、莫若曰蝕大、自漢興日

餽亦爲呂霍之屬見。曰今揆之豈有此等之效與。諸侯拘迫漢制。牧相執持之也。又安獲齊趙七國之難。將相大臣。褻誠秉忠。惟義是從。又惡有上官博陸宣成之謀。若夫徒步豪傑。非有陳勝項梁之羣也。匈奴夷狄。非有冒頓郅支之倫也。方外內鄉。百蠻賓服。殊俗慕義。八州懷德。雖使其懷挾邪意。猶不足憂。又況其無乎。求於夷狄無有。求於臣下無有。徵後宮也。當何日塞之。日者建始元年正月。白氣出於營室。營室者。天子之後宮也。正月於尚書爲皇極。皇極者。王氣之極也。白者。西方之氣。其於春當廢。今正於皇極之月。興廢氣於後宮。視后妾無能懷任保全者。曰著繼嗣之微。賤人將起也。至其九月。流星如瓜。出於文昌。貫紫宮。尾委曲如龍。臨於鉤陳。此又章顯前尤著在內也。其後則有北宮井溢。南流逆理。數郡水出。流殺人民。後則訛言相傳。驚震女童入殿。咸莫覺知。夫河者水陰。四瀆之長。今乃大決。沒漂陵邑。斯昭陰威盈溢。違經絕紀。

之應也。迺昔之月，鼠巢於樹，野鵲變色。五月庚子，鳥焚其巢。太山之域，易曰：鳥焚其巢，旅人先笑後號咷，喪牛于易。凶言，王者處民上，如鳥之處巢也，不顧卹百姓，百姓畔而去之。若鳥之自焚也，雖先快意說笑，其後必號而無及也。百姓喪其君，若牛亡其毛也。故稱凶。泰山，王者易姓告代之處，今正於岱宗之山，甚可懼也。三月癸未，大風自西，搖祖宗寢廟，揚裂帷席，折拔樹木，頓僵車輦，毀壞檻屋，災及宗廟，足爲寒心。四月己亥朔，日蝕東井，轉旋且索，與旣無異。己猶戊也，亥復水也。明陰威咎在內，於戊己虧君體，著絕世於皇極，顯禍敗及京都。於東井變怪眾備，末重益大，來數益甚，成形之禍。月已迫切，不救之患。日寢婁深，咎敗灼灼，若此豈可已忽哉。書云：高宗彤日，粵有雉雉。祖己曰：惟先假王，正厥事。又曰：雖休勿休，惟敬五刑，己成三德。卽飭椒房及掖庭耳。今皇后有所疑，便不便其條刺，使大長秋來白之，吏拘於法，亦安足過。蓋矯枉者過。

直古今同之、且財幣之省、特牛之祠、其於皇后、所已扶助德美、爲華寵也、咎根不除、災變相襲、祖宗且不血食、何戴侯也、傳不云乎、已約失之者鮮審、皇后欲從其奢與、朕亦當法孝武皇帝也、如此則甘泉建章可復興矣、世俗歲殊時變、日化、遵事制宜、因時而移、舊之非者、何可放焉、君子之道、樂因循而重改作、昔魯人爲長府、閔子騫曰、仍舊貫、如之何、何必改作、蓋惡之也、詩云、雖無老成人、尚有典刑、曾是莫聽、大命已傾、孝文皇帝、朕之師也、皇太后、皇后成法也、假使太后在彼時、不如職、今見親厚、又惡可已踰乎、皇后其刻心秉德、毋違先后之制度、力誼勉行、稱順婦道、減省羣事、儉約爲右、其孝東宮、毋闕期望、推誠永究、爰何不臧、養名顯行、已息厭讜、垂則列妾、使有法焉、皇后深惟母忽、漢書外戚孝成許后傳度、皇后適上疏、上于是采劉向谷永之言、已報、王鳳陽朔初

朕秉事不明政事多闕故天變婁祿咸在朕躬將軍迺深引過自
予欲乞骸骨而退則朕將何嚮焉書不云乎公無困我務專精神
安心自持期於亟瘳稱朕意焉

漢書元后傳

報翟方進

綏和元年十二月

定陵侯長已伏其辜君雖交通傳不云乎朝過夕改君子與之君

何疑焉其專心壹意母怠醫藥已自持

漢書翟方進傳

幼弱減死罪令

鴻嘉元年

年未滿七歲賊鬪殺人及犯殊死者上請廷尉已聞得減死

漢書刑法

志

鼎銘

綏和初

寇盜平黃河清

鼎錄

賜進士出身三品銜廣東等處提刑按察使司按察使兼管驛傳事務黃岡王毓藻校刊

全漢文卷八終

全漢文卷九

烏程嚴可均校輯

哀帝

帝諱欣元帝庶孫定陶恭王子綏和元年徵立爲皇太子二年四月卽位改元二建平元壽在位六年諡曰孝哀皇帝

尊定陶傅太后等詔

綏和二年五月

春秋母曰子貴尊定陶太后曰恭皇太后丁姬曰恭皇后各置左

右詹事食邑如長信宮中宮

漢書哀紀又見孝元傅昭儀傳

罷樂府官詔

綏和二年六月

惟世俗奢泰文巧而鄭衛之聲興夫奢泰則下不孫而國貧文巧則起末背本者眾鄭衛之聲興則淫辟之化流而欲黎庶敦朴家給猶濁其源而求其清流豈不難哉孔子不云乎放鄭聲鄭聲淫其罷樂府官郊祭樂及古兵法武樂在經非鄭衛之樂者條奏別

屬他官

漢書禮樂志按哀紀亦載此詔約文云鄭聲淫而亂樂聖王所放其罷樂府又見通典一百四十一

詔王莽

先帝委政於君而棄羣臣朕得奉宗廟誠嘉與君同心合意今君移病求退曰若朕之不能奉順先帝之意朕甚悲傷焉已詔尚書待君奏事

漢書王莽傳莽上書乞骸骨哀帝遣尚書令詔莽

益封王根等詔

綏和二年六月

曲陽侯根前在位建社稷策侍中太僕安陽侯舜往時護太子家導朕忠誠專壹有舊恩新都侯莽憂勞國家執義堅固庶幾與爲治太皇太后詔休就第朕甚閔焉其益封根二千戶舜五百戶莽三百五十戶已莽爲特進朝朔望又還紅陽侯立京師

漢書元后傳

益封河間王良詔

綏和二年六月

河間王良喪太后三年爲宗室儀表益封萬戶

漢書哀紀又見河間王德傳哀帝下

詔哀

議限列名田詔

綏和二年六月

制節謹度、已防奢淫、爲政所先、百王不易之道也、諸侯王列侯公
主吏二千石、及豪富民、多畜奴婢、田宅亡限、與民爭利、百姓失職、
重困不足、其議限列、

漢書
哀紀

遣使循行水災詔

綏和二年秋

朕承宗廟之重、戰戰兢兢、懼失天心、間者日月亡光、五星失行、郡
國比比地動、迺者河南潁川部水出、流殺人民、敗壞廬舍、朕之不
德、民反蒙辜、朕甚懼焉、已遣光祿大夫循行、舉籍賜死者棺、錢人
三千、其令水所傷縣邑及他郡國災害什四、已上、民貲不滿十萬、
皆無出今年租賦、

漢書
哀紀

遣王根就國詔

綏和二年七月

先帝遇根、況父子、至厚也、今迺背忘恩義、已根嘗建社稷之策、遣
就國、免況爲庶人、歸故郡、根及況父、商所薦舉爲官者、皆罷、

漢書
元后

傳

益封王莽詔 綏和二年

新都侯莽憂勞國家執義堅固朕庶幾與爲治太皇太后詔莽就第朕甚閔焉其曰黃郵聚戶三百五十益封莽位特進給事中朝朔望見禮如三公車駕乘緣車從 漢書王莽傳

舉賢詔 建平元年二月

蓋聞聖王之治已得賢爲首其與大司馬列侯將軍中二千石州牧守相舉孝弟惇厚能直言通政事延于側陋可親民者各一人

漢書哀紀

免孫寶詔 建平初

制詔丞相大司空隸寶奏故尚書僕射崇冤請獄治尚書令昌案崇近臣罪惡暴著而寶懷邪附下罔上已春月作詆欺遂其姦心蓋國之賊也傳不云乎惡利口之覆邦家其免寶爲庶人 漢書孫寶傳

傳

尊恭皇太后詔

建平二年四月

漢家之制推親親曰顯尊尊定陶恭皇之號不宜復稱定陶其尊

恭皇太后曰帝太太后稱永信宮恭皇后曰帝太后稱中安宮立

恭皇廟于京師赦天下徒

漢書哀紀又見外戚孝元傳昭儀傳有刪節

葬丁太后

建平二年六月

朕聞夫婦一體詩云穀則異室死則同穴昔季武子成寢杜氏之

殯在西階下請合葬而許之附葬之禮自周興焉郁郁乎文哉吾

從周孝子事亡如事存帝太后宜起陵恭皇之園

漢書哀紀又見外戚定陶恭姬傳

大赦改元詔

建平二年六月

制詔丞相御史蓋聞尚書五曰考終命言大運壹終更紀天元人

元考文正理推歷定紀數如甲子也朕曰眇身入繼太祖承皇天

總百僚子元元未有應天心之效卽位出入三年災變數降日月失度星辰錯繆高下貿易大異連仍盜賊並起朕甚懼焉戰戰兢兢惟恐陵夷惟漢至今二百餘載麻紀開元皇天降非材之佑漢國再獲受命之符朕之不德曷敢不通夫受天之元命必與天下自新其大赦天下召建平二年爲太初元將元年號曰陳聖劉太平皇帝漏刻百二十爲度布告天下使明知之

漢書李尋傳又見哀紀有剛節

又見文館詞林六百六十八

蠲除改元制書詔

建平二年二月

朕獲保宗廟爲政不德變異屢仍恐懼戰栗未知所繇待詔夏賀良等建言改元易號增益漏刻可曰永安國家朕信道不篤過聽賀良等言冀爲海內獲福卒無嘉應久旱爲災曰問賀良等對當復改制度皆背經誼違聖制不合時宜夫過而不改是爲過矣六月甲子制書非赦令也皆蠲除之賀良等反道惑眾姦態當窮竟

皆下獄

漢書李尋傳又見哀紀有刪節

策詔王崇

建平三年九月

朕曰君有累世之美故踰列次在位曰來忠誠匡國未聞所繇反懷詐譖之辭欲曰攀救舊姻之家大逆之辜舉錯專恣不遵法度亡已示百僚左遷爲大司農

漢書王吉傳

封傅商爲汝昌侯詔

建平四年二月

朕幼而孤皇太后躬自養育免于襁褓教道曰禮至於成人惠澤茂焉欲報之德卑天罔極前追號皇太后父爲崇祖侯惟念德報未殊朕甚慙焉侍中光祿大夫商皇太后父同產子小自保大恩義最親其封商爲汝昌侯爲崇祖侯後更號崇祖爲汝昌哀侯

漢書鄭崇傳

封董賢等詔

建平四年八月

朕居位曰來履疾未瘳反逆之謀相連不絕賊亂之臣近侍帷幄

前東平王雲與后謁祝詛朕使侍醫伍宏等內侍案脈幾危社稷殆莫甚焉昔楚有子玉得臣晉文爲之側席而坐近事汲黯折淮南之謀今雲等至有圖弑天子逆亂之謀者是公卿股肱莫能悉心務聰明曰銷厥未萌之故賴宗廟之靈侍中駙馬都尉賢等發覺曰聞咸伏其辜書不云乎用德章厥善其封賢爲高安侯南陽太守寵爲方陽侯左曹光祿大夫躬爲宜陵侯

漢書王嘉傳又息

躬寵因賢曰間封賢爲高安侯寵爲方陽侯躬爲宜陵侯食邑各千戶

建平四年冬

舉明習兵法詔

聞者災變不息盜賊眾多兵革之徵或頗著見未聞將軍惻然深目爲意簡練戎兵繕修干戈器用濫惡就當督之天下雖安忘戰必危將軍與中二千石舉明習兵法有大慮者各一人將軍二人

詣公車

漢書息夫躬傳

日蝕詔

元壽元年正月

朕獲保宗廟，不暇夙夜憂勞，未皇寧息，惟陰陽不調，元元不
贍，未睹厥咎，屢敕公卿，庶幾有望，至今有司執法，未得其中，或上
暴虐，假執獲名，溫良寬柔，陷於亡滅，是故殘賊彌長，和睦日衰，百
姓愁怨，靡所錯躬，迺正月朔日，有蝕之，厥咎不遠，在余一人，公卿
大夫，其各悉心，勉師百寮，敦任仁人，黜遠殘賊，期于安民，陳朕之
過失，無有所諱，其與將軍列侯中二千石舉賢良方正能直言者
各一人，大赦天下。

漢書
哀紀

左遷毋將隆詔

元壽元年

制詔丞相御史大夫，交讓之禮興，則戾芮之訟息，隆位九卿，既無
已匡朝廷之不逮，而反奏請與，永信官爭貴賤之賈，程奏顯言眾
莫不聞舉錯，不繇誼理，爭求之名自此始，無已示百寮，傷化失俗，
已隆前有安國之言，左遷爲沛郡都尉。

漢書毋
將隆傳

免傅嘉詔

元壽元年

前爲侍中、毀譖仁賢、誣愬大臣、令俊艾者久失其位、嘉傾覆巧僞、

挾姦曰罔上、崇黨曰蔽朝、傷善曰肆意、詩不云乎、讒人罔極、交亂

四國、其免嘉爲庶人、歸故郡、漢書孔光傳

免息夫躬、孫寵詔、元壽二年

南陽太守方陽侯寵、素亡廉聲、有酷惡之資、毒流百姓、左曹光祿

大夫宜陵侯躬、虛造詐譖之策、欲曰詿誤朝廷、皆交遊貴戚、趨權

門爲名、其免躬寵官、遣就國、漢書息夫躬傳

詔上計丞史歸告二千石、元壽二年

詔書殿下、禁吏無苛暴、丞史歸告二千石、順民所疾苦、急去殘賊、

審擇良吏、無任苛刻、治獄決訟、務得其中、情詔憂百姓困於衣食、

二千石帥勸農桑、思稱厚恩、有曰賑贍之、無煩撓奪民時、今日公

卿曰下、務飭儉、格奢侈、過制度、曰益甚、二千石身帥有曰化之、民

允食者、請諭曰法、養視疾病、致醫藥、務治之、詔書無飾廚養、至今

未變又更過度甚不稱歸告二千石務省約如法且案不改者長吏聞宮寺鄉亭漏敗墻垣隳壞不治無辨護者不勝任先自劾不應法歸告二千石聽

續漢百官志注引漢書儀

御史大夫敕上計丞吏

詔書殿下布告郡國臣下承宣無狀多不究百姓不蒙恩被化守長吏到郡與二千石同力爲民興利除害務有已安之稱詔書郡國有茂才不顯者言殘民貪汙煩擾之吏百姓所苦務勿任用方察不稱者刑罰務於得中惡惡止其身選舉民侈過度務有已化之問今歲善惡孰與往年對上問今年盜賊孰與往年得無有羣輩大賊對上

續漢百官志注引漢書儀

策免彭宣

建平元年十月

有司數奏言諸侯國人不得宿衛將軍不宜典兵馬處大位朕惟將軍任漢將之重而子又前取淮陽王女婚姻不絕非漢之制使

光祿大夫曼賜將軍黃金五十斤安車駟馬其上左將軍印綬已

關內侯歸家

漢書彭宣傳

策免何武

建平初

君舉錯煩苛不合眾心孝聲不聞惡名流行無已率示四方其上

大司空印綬罷歸就國

漢書何武傳

策免師丹

建平初

夫三公者朕之腹心也輔善相過匡率百僚和合天下者也朕既不明委政於公閒者陰陽不調寒暑失常變異婁臻山崩地震河決泉涌流殺人民百姓流連無所歸心司空之職尤廢焉君在位出入三年未聞忠言嘉謀而反有朋黨相進不公之名乃者已挺力田議改幣章示君君內爲朕建可改不疑已君之言博考朝臣乃希眾雷同外已爲不便令觀聽者歸非於朕朕隱忍不宣爲君受愆朕疾夫比周之徒虛僞壞化寢已成俗故屢已書飭君幾君

省過求己而反不受退有後言及君奏封事傳於道路布聞朝市
言事者曰爲大臣不忠辜陷重辟護虛采名諂議旬旬流於四方
腹心如此謂疏者何殆繆於二人同心之利焉將何日率示羣下
附親遠方朕惟君位尊任重慮不周密懷謖迷國進退違命反覆
異言甚爲君恥之非所曰共承天地永保國家之意曰君嘗託傳
位未忍考于理已詔有司赦君勿治其上大司空高樂侯印綬罷
歸漢書師丹傳

策免傅喜 建平二年二月

君輔政出入三年未有昭然匡朕不逮而本朝大臣遂其姦心咎
繇君焉其上大司馬印綬就第漢書傅喜傳

策免孔光 建平二年四月

丞相者朕之股肱所與共承宗廟統理海內輔朕之不逮曰治天
下也朕既不明災異重仍日月無光山崩河決五星失行是章朕

之不德而股肱之不良也君前爲御史大夫翼輔先帝出入八年卒無忠言嘉謀今相朕出入三年憂國之風復無聞焉陰陽錯謬歲比不登天下空虛百姓饑饉父子分散流離道路已十萬數而百官羣職曠廢已姦軌放縱盜賊並起或攻官寺殺長吏數已問君君無怵惕憂懼之意對母能爲是已羣卿大夫咸情哉莫已爲意咎由君焉君秉社稷之重總百僚之任上無已匡朕之闕下不能綏安百姓書不云乎毋曠庶官天工人其代之於虐君其上丞相博山侯印綬罷歸

漢書孔光傳

策蕭育

南郡盜賊羣輩爲害朕甚憂之已太守威信素著故委南郡太守之官期於爲民除害安元元而已亡拘于小文

漢書蕭望之附傳

册免丁明

元壽元年九月

前東平王雲貪欲上位祠祭祝詛雲后舅伍宏已醫待詔與校祕

書郎楊閎結謀反逆禍甚迫切賴宗廟神靈董賢等自問咸伏其辜將軍從弟侍中奉車都尉吳族父左曹屯騎校尉宜皆知宏及栢丹諸侯王后親而宣除用丹爲御屬吳與宏交通厚善數稱薦宏宏曰附吳得興其惡心因醫技進幾危社稷朕曰恭皇后故不忍有云將軍位尊任重旣不能明威立義折消未萌又不深疾雲宏之惡而懷非君上阿爲宣吳反痛恨雲等揚言爲羣下所冤又親見言伍宏善醫死可惜也賢等獲封極幸嫉妬忠良非毀有功於戲傷哉蓋君親無將將而誅之是曰季友鳩叔牙春秋賢之趙盾不討賊謂之弑君朕甚閔將軍陷于重刑故曰書飭將軍遂非不改復與丞相嘉相比令嘉有依得曰罔上有司致法將軍請獄治朕惟噬膚之恩未忍其上票騎將軍印綬罷歸就第

漢書董賢傳

冊董賢爲大司馬大將軍

元壽元年十二月

朕承天序惟稽古建爾于公曰爲漢輔往悉爾心統辟元戎折衝

綏遠匡正庶事允執其中天下之眾受制于朕曰將為命曰兵為威可不慎與

漢書董賢傳

曰太后

皇帝聞太后詔甚悲大司馬即不起皇帝即不敢聽政

漢書王莽傳

報平當

建平三年三月

朕選于眾曰君為相視事日寡輔政未久陰陽不調冬無大雪旱氣為災朕之不德何必君罪君何疑而上書乞骸骨歸闕內侯爵邑使尚書令譚賜君養牛一上尊酒十石君其勉致醫藥曰自持

漢書平當傳

責問王嘉

元壽元年三月

相等前坐在位不盡忠誠外附諸侯操持兩心背人臣之義今所稱相等材美足曰相計除罪君曰道德位在三公曰總方略一統萬類分明善惡為職知相等罪惡陳列著聞天下時輒曰自劾今

又稱舉相等云爲朝廷惜之大臣舉錯恣心自在迷國罔上近由君始將謂遠者何對狀漢書王嘉傳嘉奏封事薦廷尉梁相等後封還益董賢戶事上發怒召嘉詰尚書問

上書謝爲皇太子

臣幸得繼父守藩爲諸侯王材質不足已假充太子之宮陛下聖德寬仁敬承祖宗奉順神祇宜蒙福祐子孫千億之報臣願且得畱國邸旦夕奉問起居俟有聖嗣歸國守藩漢書哀紀成帝徵定陶王立爲皇太子謝

日云云書奏天子報聞

謹按漢書有平帝紀平帝詔書皆莽白太后太后下詔耳今編入元后集中不列平帝名目從其實也

賜進士出身三品銜廣東等處提刑按察使司按察使兼管驛傳事務黃岡王毓藻校刊

全漢文卷九終

全漢文卷十

烏程嚴可均校輯

呂后

后諱雉字娥姁單父人高帝爲亭長時納之漢元年立爲王后
五年立爲皇后惠帝卽位尊爲皇太后少帝卽位臨朝稱制尋
廢少帝立恆山王弘凡臨朝八年

除重舉詔

元年

前日孝惠皇帝言欲除三族舉妖言令議未決而崩今除之

漢書呂后紀

議定列侯功次詔

二年

高皇帝匡飭天下諸有功者皆受分地爲列侯萬民大安莫不受
休德朕思念至於久遠而功名不著亡日尊大誼施後世今欲差
次列侯功已定朝位臧于高廟世世勿絕嗣子各襲其功位其與

列侯議定奏之

漢書呂后紀

廢少帝詔

四年夏

凡有天下治為萬民命者蓋之如天容之如地上有驩心呂安百姓百姓欣然曰事其上驩欣交通而天下治今皇帝疾久不已迺失惑惛亂不能繼嗣奉宗廟祭祀不可屬天下其代之

史記呂后紀帝壯或

聞其母死非其皇后子迺出言曰后安能殺吾母而名我我未壯壯即為變太后幽之永巷中太后曰云云漢書呂后紀作詔

七年

昭靈夫人太上皇妃也武哀侯宣夫人高皇帝兄姊也號諡不稱

其議尊號

漢書呂后紀

報匈奴冒頓書

單于不忘弊邑賜之曰書弊邑恐懼退日自圖年老氣衰髮齒墮落行步失度單于過聽不足曰自污弊邑無罪宜在見赦竊有御車二乘馬二駟曰奉常駕

漢書匈奴傳高后時呂嬃寢時為昔使使遺高后使大謁者張澤報書

程姬

程姬，景帝妃，生魯共王餘。江都易王非，膠西王卬，武帝時就魯國爲王太后。

遺孫女徵臣書

國中口語籍籍，慎無復至江都。漢書：江都王非傳：非薨，子建嗣。建數使使至長安，迎徵臣。書：恭王太后聞之，遣徵臣書。

昭上官后

后，隴西上邽人。左將軍上官桀孫女。昭帝始元四年，召爲婕妤，尋立爲皇后。昌邑王卽位，尊爲皇太后。時年十五。宣帝卽位，爲太皇太后。立四十七年。建昭二年崩，年五十二。

璽書徵昌邑王

制詔昌邑王，使行大鴻臚事，少府樂成，宗正德，光祿大夫吉，中郎將利，漢徵王乘七乘傳，詣長安邸。漢書：武帝子，傳。

公孫健仔

健仔名徵史、宣帝納爲妃、拜健仔、生東平王宇、元帝初、隨王就國爲東平太后、

奏免東平相王尊

尊爲相、倨慢不臣、王血氣未定、不能忍、愚誠恐母子俱死、今妾不得使王復見尊、陛下不留意、妾願先自殺、不忍見王之失義也、漢書

王尊傳

元王皇后

后名政君、魏郡元城人、宣帝時、東平王聘爲姬、未入而王薨、五鳳中、入掖廷爲家人子、甘露中、元帝爲太子、納爲妃、生成帝、元帝卽位、召爲健仔、尋立爲皇后、成帝卽位、尊爲皇太后、居長信宮、哀帝卽位、尊爲太皇太后、平帝卽位、臨朝、委政于莽、平帝崩、立劉嬰爲孺子、召莽爲攝皇帝、莽篡位、廢爲新室文母、太皇太

后建國五年崩年八十四

詔有司復甘泉泰畤等祠

永始三年十月

蓋聞王者承事天地交接泰一尊莫著於祭祀孝武皇帝大聖通明始建上下之祀營泰畤於甘泉定后土於汾陰而神祇安之饗國長久子孫蕃滋累世遵業福流於今今皇帝寬仁孝順奉循聖緒靡有大愆而久無繼嗣思其咎職殆在徙南北郊違先帝之制改神祇舊位失天地之心曰妨繼嗣之福春秋六十未見皇孫食不甘味寢不安席朕甚悼焉春秋大復古善順祀其復甘泉泰畤汾陰后土如故及雍五畤陳寶祠在陳倉者

漢書郊祀志下

治問成帝發病狀詔

綏和二年三月

皇帝暴崩羣臣譴譁怪之掖庭令輔等在後庭左右侍燕迫近雜與御史丞相廷尉治問皇帝起居發病狀

漢書外戚傳下成帝崩民間歸罪趙昭儀皇太后

肩詔大司馬莽丞相大司空云云趙昭儀自殺

詔有司復長安南北郊 綏和二年三月

皇帝卽位思順天心遵經義定郊禮天下說憲懼未有皇孫故復

甘泉泰畤汾陰后土庶幾獲福皇帝恨難之卒未得其祐其復南

北郊長安如故曰順皇帝之意也 漢書郊祀志下成帝崩皇太后詔有司

詔有司復甘泉泰畤汾陰后土祠 建平三年十一月

皇帝孝順奉承聖業靡有解怠而久疾未瘳夙夜惟思殆繼體之

君不宜改作春秋大復古其復甘泉泰畤汾陰后土祠如故 漢書郊祀志下明年復令太

皇太后詔有司

貶徙趙太后詔 元壽二年七月

前皇太后與昭儀俱侍帷幄姊弟專寵錮寢執賊亂之謀殘滅繼

嗣曰危宗廟諄天犯祖無爲天下母之義貶皇太后爲孝成皇后

徙居北宮 漢書外戚孝成趙皇后傳哀帝崩王莽白太后詔有司

令傳皇后退居桂宮詔 元壽二年七月

定陶共王太后與孔鄉侯晏同心合謀背恩忘本專恣不軌與至

尊同稱號終沒至迺配食于左坐諱逆無道今令孝哀皇后退就

桂宮

漢書外戚孝哀傳皇后傳哀帝崩王莽白太皇太后下詔

廢趙皇后詔

元壽二年八月

皇后自知罪惡深大朝請希閭失婦道無共養之禮而有狼虎之

毒宗室所怨海內之讎也而尚在小君之位誠非皇天之心夫小

不忍亂大謀恩之所不能已者義之所割也今廢皇后爲庶人就

其園

漢書外戚傳

禁舉赦前事詔

元壽二年九月

夫赦令者將與天下更始誠欲令百姓改行潔已全其性命也往

者有司多舉奏赦前事累增罪過誅陷亡辜殆非重信慎刑灑心

自新之意也及選舉者其歷職更事有名之士則曰爲難保廢而

弗舉甚謬于赦小過舉賢材之義諸有臧及內惡未發而薦舉者

皆勿案驗、令士厲精鄉進、不曰小疵妨大材、自今曰來、有司無得陳赦前事、置奏上有不如詔書爲虧恩、曰不道論、定著令、布告天下、使明知之、漢書平紀

令王莽勿辭安漢公詔

元始元年正月

無偏無黨、王道蕩蕩、屬有親者、義不得阿、君有安宗廟之功、不可曰骨肉故、蔽隱不揚、君其勿辭、漢書王莽傳上

君曰選故而辭曰疾、君任重、不可闕曰時、亟起、漢書王莽傳上

益封孔光等四輔詔

元始元年正月

太傅博山侯光、宿衛四世、世爲輔相、忠孝仁篤、行義顯著、建議定策、益封萬戶、曰光爲太師、與四輔之政、車騎將軍安陽侯舜、積累仁孝、使迎中山王、折衝萬里、功德茂著、益封萬戶、曰舜爲太保、左將軍光祿勳豐、宿衛三世、忠信仁篤、使迎中山王、輔導共養、曰安宗廟、封豐爲廣陽侯、食邑五千戶、曰豐爲少傅、皆授四輔之職、疇

其爵邑各賜第一區侍中奉車都尉邯宿衛勤勞建議定策封邯

爲承陽侯食邑二千四百戶

漢書王莽傳上

呂王莽爲太傅詔

元始元年正月

大司馬新都侯莽三世爲三公典周公之職建萬世策功德爲忠臣宗化流海內遠人慕義越裳氏重譯獻白雉其呂召陵新息二縣戶二萬八千益封莽復其後嗣疇其爵邑封加如蕭相國呂莽爲太傅榦四輔之事號曰安漢公呂故蕭相國甲第爲安漢公第定著於令傳之無窮

漢書王莽傳上

聽王莽讓益封詔

元始元年正月

公自期百姓家給是呂聽之其令公奉舍人賞賜皆倍故百姓家

給人足大司徒大司空曰聞

漢書王莽傳上

拜平帝母衛姬爲中山孝王后詔

元始元年六月

中山孝王后深分明爲人後之義條陳故定陶傅太后丁姬諱天

逆理、上僭位號、徒定陶王於信都、爲共王立廟于京師、如天子制、不畏天命、侮聖人言、懷亂法度、居非其制、稱非其號、是日皇天震怒、火燒其殿、六年之間、大命不遂、禍殃仍重、竟令孝哀帝受其餘災、大失天心、天命暴崩、又令共王祭祀絕廢、精魂無所依歸、朕惟孝王后深說經義、明鏡聖法、懼古人之禍敗、近事之咎殃、畏天命、奉聖言、是迺久保一國、長獲天祿、而今孝王永享無疆之祀、福祥之大者也、朕甚嘉之、夫竊義賞善、聖王之制、其曰中山故安戶七千、益中山后湯沐邑、加賜及中山王黃金各百斤、增傳相已下秩

漢書外戚中山衛姬傳

封王堅固爲邛成侯詔

元始元年

孝宣王皇后、朕之姑、深念奉質共修之義、恩結于心、惟邛成共侯國廢祀絕、朕甚閔焉、其封共侯曾孫堅固爲邛成侯

漢書外戚孝宣王皇后傳

元始中成帝太后下詔案外戚恩澤侯表作元始元年知卽太皇太后也

令王莽平決奏事詔 元始元年

皇帝幼年朕且統政比加元服今眾事煩碎朕春秋高精氣不堪殆非所曰安躬體而有養皇帝者也故選忠賢立四輔羣下勸職永曰康寧孔子曰巍巍乎舜禹之有天下而不與焉自今曰來惟封爵乃曰聞他事安漢公四輔平決州牧二千石及茂材吏初除奏事者輒引入至近署對安漢公考故官問新職曰知其構否漢書王莽傳上

還傳喜詔 元始初

高武侯喜姿性端慤論議忠直雖與故定陶太后有屬然終不順指從邪介然守節曰故斥逐就國傳不云乎歲寒然後知松柏之後凋也其還喜長安曰故高安侯莫府賜喜位特進奉朝請漢書傳喜

罷申屠剛詔

剛所言、僻經妄說、違背大義、其罷歸田里、

後漢申屠剛傳、平帝時舉賢良方正、對策、莽令

太后下詔、

更名詔

元始二年春

皇帝二名、通於器物、今更名合於古制、使太師光奉太牢告祠高

廟

漢書平紀

賜公孫弘子孫當爲後者爵詔

元始二年四月

太皇太后詔大司徒大司空、蓋聞治國之道、富民爲始、富民之要在於節儉、孝經曰、安上治民、莫善於禮、禮與奢也、寧儉、昔者管仲相齊桓、霸諸侯、有九合一匡之功、而仲尼謂之不知禮、曰其奢泰侈擬於君故也、夏禹卑宮室、惡衣服、後聖不循、由此言之、始之威也、始一作治德優矣、莫高于儉、儉化俗民、則尊卑之序得、而骨肉之恩親、爭訟之原息、斯乃家給人足、刑錯之本也、歟、可不務哉、夫三公者、百寮之率、萬民之表也、未有樹直表而得曲影者也、孔子不云

乎。子率曰正，就敢不正。舉善而敎，不能則勸。維漢興，曰來股肱宰臣，身行儉約，輕財重義，較然著明。未有若故丞相平津侯公孫弘者也。位在丞相，而爲布被，脫粟之飯，不過一肉。故人所善賓客，皆分奉祿，曰給之，無有所餘。誠內自克約，而外從制，汲黯詰之，乃問於朝。此可謂減於制度，而可施行者也。德優則行，否則止。與內奢泰而外爲詭服，曰釣虛譽者殊科。曰病乞骸骨，孝武皇帝卽制曰：賞有功，褒有德，善善惡惡，君宜知之。其省思慮，存精神，輔曰醫藥，賜告治病，牛酒雜帛，居數月，有瘳，視事。至元狩二年，竟曰善。終於相位，夫知臣莫若君，此其效也。弘子度嗣爵，後爲山陽太守，坐法失侯。夫表德章義，所曰率俗厲化，聖王之制，不易之道也。其賜弘後子孫之次，當爲後者。爵關內侯，食邑三百戶，徵詣公車，上名尚書。朕親臨拜焉。

史記平津侯傳附錄又略見漢書公孫弘傳

詔羣臣

元始二年

蓋聞母后之義思不出乎門閭國不蒙祐皇帝年在襁褓未任親政戰戰兢兢懼於宗廟之不安國家之大綱微朕孰當統之是呂孔子見南子周公居攝蓋權時也勤身極思憂勞未綏故國奢則視之曰儉矯枉者過其正而朕不身帥將謂天下何夙夜夢想五穀豐熟百姓家給比皇帝加元服委政而授焉今誠未皇於輕靡而備味庶幾與百僚有成其勛之哉

漢書王莽傳上莽帥羣臣奏願遵帝王之常服復太官之法膳又令

太后下詔

元始二年

聞公榮食憂民深矣今秋幸熟公勤於職日時食肉愛身為國

漢書

王莽傳上

勿采王莽女詔

元始三年春

王氏女朕之外家其勿采

漢書王莽傳上

為平帝納采王莽女詔

元始三年春

遣大司徒大司空策告宗廟，雜加卜筮，皆曰：「兆遇金水，王相卦遇父母得位，所謂康強之占，逢吉之符也。」

漢書王莽傳上

詔王莽

元始三年

夫唐堯有丹朱，周文王有管蔡，此皆上聖亡柰下愚子何，曰：「其性不可移也。」公居周公之位，輔成王之主，而行管蔡之誅，不曰親親害尊尊，朕甚喜之。昔周公誅四國之後，大化乃成。至於刑錯，公其專意翼國，期於致平。」

漢書王莽傳上：莽子宇使呂寬夜持血灑莽第門，莽執宇送獄，飲藥死。甄邯等白太后下詔。

非坐不道，無得繫婦女老弱。詔

元始四年正月

蓋夫婦正則父子親，人倫定矣。前詔有司復貞婦，歸女徒，誠欲已防邪辟，全貞信，及旤悼之人，刑罰所不加。聖王之所制也。惟苛暴吏多拘繫犯法者，親屬婦女老弱，構怨傷化，百姓苦之。其明敕百寮，婦女非身犯法，及男子年八十以上，七歲以下，家非坐不道，詔

所名捕它皆無得繫其當驗者即驗問定著令漢書平紀又見通典一百六十三

詔孔光等元始四年四月

公每見叩頭流涕固辭今移病固當聽其讓令祇事邪將當遂行

其賞遣歸就第也漢書王莽傳上

許刻宰衡太傅大司馬印章詔元始四年

可轍如相國朕親臨授焉漢書王莽傳上

荅羣臣請加王莽九錫詔元始四年

可其議九錫之法漢書王莽傳上

詔孔光元始四年

太師光聖人之後先師之子德行純淑道術通明居四輔職輔導于帝今年耆有疾俊艾大臣惟國之重其猶不可已闕焉書曰無遺耆老國之將興尊師而重傅其令太師母朝十日一賜餐賜太師靈壽杖黃門令為太師省中坐置几太師入省中用杖賜餐十

七物然後歸老于第官屬按職如故漢書孔光傳又書抄五十二
年與漢
引漢官儀三條並云元始元
君為異

賜進士出身一品銜廣東等處提刑按察使司按察使兼管驛傳事務黃岡王毓藻校刊

全漢文卷十終